

太上一乘海空智藏經卷之六

月六

太上一乘海空智藏經卷之六

月六

持誠品

爾時海空智藏與諸天人真仙童子地仙道士俱起作禮長跪擎拳白天尊言大哀天尊是我今者遊於下方見諸衆生若人非人住於下方煩惱城中是諸天魔野道惡鬼共相惱害不能自安各各愁煎便大怖畏莫知依止云何一乘海空淨戒廣利天人无量衆生令得安樂受持依止清淨妙戒唯願天尊哀愍我等分別演說清淨妙戒普令衆生常住

安樂爾時

天尊答海空言善哉善哉善男子真人童子
汝等應當一心諦聽受持一乘无礙淨戒令
得利益當來衆生善男子善女人專心思惟
五種淨戒云何爲五善男子一者道戒二者
聖戒三者真戒四者仙戒五者衆生戒善男
子真人童子常當修習是五種行

爾時海空白天尊言如是所說五種戒行云
何道戒而得流行爾時

天尊答海空言善哉善哉善男子所言道戒

是一乘經秘密寶藏生種種相行所謂百八十戒三百大戒无戒之戒亦非有戒亦非无戒非非有戒非非无戒亦非非常戒亦非斷戒非斷常戒非非斷常戒善男子譬如虛空一切善法因之增長言道戒者亦復如是是諸衆生若得聞見一乘秘密海空寶藏皆生信心應當思惟真道妙戒常樂我淨具足功德无上正法

爾時海空白天尊言云何聖戒得為橋梁天尊答言善哉海空善男子所言聖戒從四

民天下仙道士國王長者得聞正法一乘智
藏微妙經典皆當愛樂貪求大乘祕密寶藏
捨離所愛六親眷屬及所居宅金銀珍寶微
妙瓔珞香花燈燭伎樂導從及諸奴僕男女
大小象馬車乘牛羊雞犬猪豚之屬復作是

月六

二

念居家逼迫猶如牢獄一切煩惱從之而生
一切饑餓從之而生於是思惟我等云何從
身是生死身是煩惱身是蟲糞身是餓虎身
如是等身受種種惡我等云何應當出家修
學无上正真妙道於是發心欲出家時邪魔

異道生大憂苦是諸魔道復當與我興大戰
爭我常念言如是我等云何復當與人戰爭
是時我等即至道場得見天尊及諸弟子威
儀具足諸根寂靜其心柔和清淨寂滅我等
衆生即至其所而求出家人於道場著大法
衣既出家已奉持禁戒威儀不缺進止安詳
无所觸犯乃至小罪心生怖畏護戒之心猶
如金剛復當得聞一乘海空秘密寶藏善男
子譬如有人持一漆盤欲度大海爾時海中
有一魔賊即從此人乞索漆盤其人聽已思

惟念言我今若與必定沒死於是答言今者
魔賊汝寧殺我漆盤叵得魔賊復言汝若不
能全與我者恩惠其半是人猶故心存不與
魔賊又言汝若不能惠我半者請願與我三
分之一是人又言寧當俱死終不與盤魔賊

月六

三

又言唯願大慈哀愍我等施我手寶是人思
惟即自念言是我寶者終不與汝魔賊又言
若復不能與我寶者我今饑窮衆苦所逼願
當濟我如微塵許是人復言然我今日方當
度海不知東西近遠云何若當與汝我今身

者大海之難何由得往又恐中路沒水而死
恨復何及善男子真人童子護持禁戒亦如
彼人護惜漆盤不與魔賊善男子真人童子
如是守護微妙淨誠亦復如是魔賊又言汝
當信我終不相欺但捨漆盤護持餘盤以是
因緣令汝安穩得至彼岸其人爾時應自念
言我今寧沒於大海中終不毀盤魔賊又言
汝若不能毀漆盤者可欲汝毀手上真寶以
是因緣令汝安穩得到彼岸如是其人亦復
不毀魔賊又言汝若不能捨手上寶亦可捨

汝身上明珠以是因緣令汝安穩得至彼岸
爾時其人亦復不捨爾時魔賊思惟良久反
面而退於是其人乘漆盤行得到彼岸思惟
念言我今行者魔賊來難我執漆盤堅固不
捨得到此岸當由我心牢固不捨如是漆盤
手寶明珠足下金鐺護持堅固起造成庫安
著寶盤善男子海空智藏若有衆生護持海
空微妙淨戒堅持牢固亦如其人護持寶盤
亦復如是

爾時海空白天尊言如是所說真道聖戒微

妙功德不可思議如是功德生種種念修種
種行云何真仙受持戒者爾時

天尊答海空言善哉問者善男子若有衆生
息世榮祿不作販賣輕秤小斗欺誑於人因
他形勢取人財物田宅倉屋不畜象馬車乘

月六

四

牛羊騾驢雞犬獼猴孔雀鸚鵡童男童女大
男大女奴婢僮僕金銀瑠璃瓊瑯等寶悉皆
施散進求奉受真人淨戒善男子若有衆生
於諸穀米大小麥豆黍粟稻麻生熟食具常
以一食未曾再食若行齋食未曾再食若行

齋食日至中食常知止足不受別請不復雜
食五辛薰物悉不食之如是身心无有穢惡
常爲諸天一切世人恭敬供養尊重讚歎終
不捨離若男若女親近聞聽一乘海空微妙
寶藏善男子若有衆生不穢庫藏若金若銀
七寶金牀雜色編織悉不坐卧靜心不視象
馬車乘繒綵妙色鳳凰孔雀鸚鵡等色亦不
顧視亦不觀聽吹笛鼓琴箏篳篥篳篥伎樂之
聲亦不占相手足面目不作卜筮不作王子
不懷諂曲不嫉佞心平等愛念安穩之事善

男子如是真仙微妙淨戒堅持在心遮制衆
魔得道真性无有差別曉了分明善男子若
有衆生受持淨誠如是諸禁當作是願寧以
此身投於火聚深穴長坑終不毀犯如是微
妙真人淨誠善男子真人童子復作是願寧

月六

五

以洋鐵周而纏身終不敢以破戒之身常受
信心施主衣服善男子真人童子復作是願
寧以此身卧於鐵牀終不敢以破誠之身常
受信心施主牀座善男子真人童子復作是
願寧以此身受千毒針不敢以破戒之身常

受信心施主甘露醫藥善男子真人童子復
作是願寧以此身投於鑊湯終不敢以破戒
之身常受信心施主房舍屋宅善男子真人
童子復作是願寧以身碎如微塵終不敢以
破戒之身常受信心禮拜恭敬善男子真人
童子復作是願寧以熱鐵鈎其兩目終不染
心犯他好色善男子真人童子復作是願寧
以熱鐵塞於耳門終不染心聽他音聲善男
子真人童子復作是願寧以利刀割其鼻根
終不染心貪嗅諸香善男子真人童子復作

是願寧以利刀裂其舌根終不染心貪著羨
味善男子真人童子復作是願寧以斧刀斬
斫其身終不染心貪著諸觸何以故如是因
緣能令衆生墮於地獄畜生餓鬼善男子真
人童子保護受持如是等戒悉以施行一切
衆生如是因緣欲令衆生護持禁戒得清淨
戒微妙具足成就一乘海空之戒善男子真
人童子修持一乘清淨戒時即得往於玉清
之宮不傾不動不退不散善男子譬如玉京
隨風大小亦不能動真人童子受持淨戒住

於玉京亦復如是善男子真人童子常以一
心脩治一乘清淨戒者住於玉京不傾不動
亦復不為諸煩惱內魔之所傾動不為外魔
之所墮落何以故真人童子坐道場時騫木
樹下雖有天魔不能傾動善男子海空智藏
云何衆生清淨戒者是二十戒五戒三戒如
是等戒度生死戒是法橋梁捨惡防罪觀法
性空亦空不空不空空故故有我身我今觀
身頭足耳目皮肉筋骨脾腎心肺肝膽腸胃
五根等藏大小便利涕唾目淚肪膏腦膜骨

月六

六

髓膿血悉皆不淨如是觀念誰有是我我為
屬誰住在何處誰屬於我為畜生耶為餓鬼
耶為人天耶為草木耶為魚蟲耶復作是念
骨是我耶離骨是耶復作是念骨色異相青
黃白色如是骨相亦復非我何以故我之身
相亦非青黃及白等色我今思惟是我之相
非我之相復作是念如是骨者從因緣生依
因足骨以受我踝依因踝骨以受我踳依因
踳骨以受我膝依因膝骨以受我脛依因脛
骨以受我腕依因腕骨以受我腰依因腰骨

以受我腓依因腓骨以受我肋依因肋骨以
受我項依因項骨以受我領依因領骨以受
我齒依因齒骨以受我髑髏復因項骨以受
我肩依因肩骨以受我臂依因臂骨以受我
腕依因腕骨以受我掌依因掌骨以受我指

月六

七

善男子如是我觀種種依因種種骨相是我
依因是我根柱我當思惟觀此身時所有骨
相一切分離得是觀已即斷諸欲復作是念
我身死生猶如流水亦復非我若識非我或
生或死或復是我或復非我復作是念我是

化生我非化生是四大造非四大造四大之
中何大是我何大非我善男子譬如筵篔隨
風出聲何絃有音何絃无音善男子四大造
我亦復如是是故我身因緣和合猶如幻化
隨聲而有種種形相種種所造汝等衆生應
當一心受持一乘海空寶藏祕密之戒
爾時海空智藏即起于座稽首道前白天尊
言如是所說若有衆生善男善女一心正念
恭敬讚歎受持一乘清淨戒者常念守護如
是之人若有外魔共來亂忽我等門徒令其

斷命絕於外魔如此門徒若墮地獄无有是處何以故此門人者是我神剛是我力士能護衆生持受淨戒云何其人墮於地獄爾時天尊讚海空言善哉善哉善男子如汝所說我於往昔化生下方作大國王名曰法明常以受念大乘經典善心信敬无有麤惡嫉妬之心口常演說愛語善語財物布散貧窮孤獨勇猛精進无有休息

爾時東方聞有一乘海空智藏微妙經典我於是時憂愁悲泣不能自止動於國內王后

太子及諸羣臣各共涕泣爾時龍獸麒麟師
子鳳凰孔雀鸚鵡白鵠悉來翔集於是大臣
瞻仰王顏開容明色啓白大王今者云何涕
泣之聲爾時大王答大臣言我聞東方有大
乘經海空寶藏但我王恨不能自往是故憂

月六

八

愁爾時國中有大長者自生惡念種種誹謗
生不信心啓白王言臣聞一乘海空寶藏是
幻化術但是道家妄造此耳須臾之間爾時
長者身體黃赤蟲臭流出髮毛墮落形如餓
鬼項如牛領爾時大王即斷其命以是因緣

不墮地獄善男子擁護攝持一乘寶藏微妙
經典乃有如是威儀神力巍巍堂堂不可思
議善男子衆生住時於三界難有諸病苦云
何爲苦生苦病苦死苦怨苦憎苦離苦別苦
是故衆生煩惱障苦隨有生處皆悉貪受以
其不見老病死故善男子譬如毒虎口能殺
人脚手亦能三界衆生住於諸有亦復如是
善男子譬如大海彼岸之國多有甘露若有
食者年得三千除諸病苦安穩快樂愚癡之
人貪其味故裝治船舫往彼給取不知海中

有大鱗魚能吞船舫

爾時諸人即發去取不知大魚已吞船沒是
故智者不貪彼味令得安穩善男子真人童
子不欲貪愛煩惱之味亦復如是善男子真
人童子住海空藏觀煩惱苦亦如智人觀於

月六

九

魚船不生歡喜善男子人生老衰常恒快樂
貪於愛慾譬如池水蓮花中生開敷鮮榮甚
可愛樂遇天霜電悉皆毀壞善男子人生快
樂愛於色慾煩惱逼身墮三塗苦亦復如是
譬如折軸无所復用老亦如是不得還少譬

如陸龜心常念水善男子亦復如是雖爲老
容恒憶壯年譬如秋月池中蓮花一切衆人
之所樂見而忽萎黃人所棄薄善男子盛年
壯色亦復如是悉爲一切之所愛樂而忽老
容衆人所惡亦復如是善男子譬如甘蔗既
被壓已滓无復味善男子壯年興盛亦復如
是旣被老容无有情欲善男子譬如磨鏡日
日常執不離心曾善男子人亦如是壯年華
整老則衰羸形神枯悴常思壯時不離心曾
善男子真人童子脩行一乘海空寶藏觀於

病苦恒有畏怖不安穩念善男子譬如冤家
恒有憂愁真人童子亦復如是觀於煩惱恒
有憂愁譬如稻莠節蟲即死善男子人亦如
是人
人有復病難可醫治須臾則死譬如王駕
大臣前行王居其後臨至陣敵王臣追逐不

能相離善男子真人童子亦復如是隨衆生
病不能捨離安樂衆生觀其病苦善男子真
人童子脩行大乘寶藏經典觀於衆生死壞
苦惱如火災起能除一切唯有寶臺力所不
至善男子災火起燒滅除一切唯有真人住

於大乘海空寶藏火不能及亦如水災一切
滄沒唯除蓬萊力不及故善男子水沒三界
一切衆生悉皆滄沒唯有真人住大乘船海
空寶藏復次譬如鸚鵡能聲能言鳳凰孔雀
悉來翔儔善男子真人童子持此經時一切

月六

十

衆生悉來讚歎亦復如是爾時

天尊以慈惠眼照彼地獄衆生餓鬼人及非
人各各涕泣哀哉我等生在地獄枷鎖杻械
禁繫我身日生日死无有休息爾時萬劫裸
形餓鬼自念思惟我爾云何生於苦地我前

當作爲復云何爲誹謗耶爲貪愛耶爲邪見
耶爲惡逆耶爾時有一髑髏无形餓鬼思惟
我今云何骨肉各處受種種苦日生日死无
暫安時我前當作爲復云何爲劫盜耶爲捨
他耶我今苦者復有父母爲我獨耶父母兄
弟恩愛百親悉在何方作是念已各各涕泣
蹲臂而止爾時

天尊變作牛頭即便告言汝等餓鬼得見天
上諸仙人不餓鬼答言實見實見又問餓鬼
汝見天上香飯妙味甘露藥不餓鬼答言實

見實見爾時牛頭告餓鬼言彼等仙人是汝
親弟昔在王家汝為長兄常行惡逆殺害无
度縱情愛慾遏斷他婦恃強抑弱噴高自是
弟常慈念施散貧窮樂於山水隱尋道德汝
但斷遏不與弟同弟得飛仙天給香飯甘露

月六

十一

妙味汝為餓鬼饑渴難忍爾時餓鬼聞是說
已各共涕泣聲如雷震隱隱隆隆爾時地獄
若男若女若人非人各各舉手仰天擎拳唱
言苦哉苦哉於是地獄悉皆停考若男若女
各共安坐爾時空中有一仙人告餓鬼等今

我甘露汝能服不我甘露者能令衆生不饑
不渴不生不死不苦不樂餓鬼答言饑窮之
急寧能不服

爾時仙人即授甘露餓鬼等輩一人二人十
人百人千人億人无不飽足爾時仙人告餓
鬼言我有妙藥汝能服不是我藥者服令衆
生斷諸苦惱住安樂地於是餓鬼各自答言
千身之苦願爲救拔仙人於是即授一乘海
空淨戒爾時餓鬼得受戒已即得變身化生
端正得了三世善惡之根復次善男子海空

智藏善知无量方便之力化度衆生除苦惱
城善男子譬如良藥能除衆生種種病根善
男子譬如智人善解衆語爲諸衆生作大譯
師善男子譬如真金隨人造作種種瓔珞善
男子海空亦爾常以法教隨諸衆生種種分
別方便演說令諸衆生見无有我无有我故
諸行无常何以故以是因緣諸法无我有我
生者則知无常是諸衆生餓鬼等輩无有一
法不從緣生以是因緣轉輪生死

爾時海空白天尊言云何諸法生无有我若

无有我亦无冤親既无冤親云何餓鬼各共
涕哭爾時

天尊答海空言善男子我今演說諸法无常
无有我者欲令衆生觀於无我亦无有生无
有生故生已滅故如電石光如炎如夢如幻

月六

十二

如化善男子是我身者從父母生父母變已
是我身者亦變无生是故當知一切諸法无
有我者以是因緣悉皆无常善男子冤親餓
鬼從因緣生何以故譬如貨易齋持雜寶遠
到他國種種貪求忽被賊傷喪其身命善男

子愚癡親色馳行東西不辭日夜忽被毒傷
亦復如是復次譬如官祿恃其氣力抑於百
姓自作无道忽被執繫枷鎖杻械禁縛其身
形體損瘦如百年病善男子一切衆生恃其
三毒貪行十惡忽被命斷變成餓鬼地獄牛
頭拷楚无寧亦復如是

爾時海空白天尊言如是說者難可思議微
妙上法輪轉周徧乃作如是分別真性譬喻
甚深智慧海空祕密寶藏具足功德利益衆
生度脫一切猶如惠船度生死海爾時

天尊答海空言善哉善哉善男子汝今何故
於一乘中生種種想善男子海空智藏實是
甚深微妙功德不變不異湛然常住猶若虛
空善男子若有衆生計海空藏是我身者我
即常住不壞不敗我即海空海空是我我即

月六

十三

是道道即是我我即天尊天尊是我我即一
乘智慧海空秘密寶藏能說妙法令諸衆生
聽受讚歎是我法輪若有人言我是常住无
有變易云何說言轉大法輪是故汝等應當
說言天尊上人乃能輪轉說大法輪善男子

譬如六根因眼緣色因色思惟因緣和合得
生眼識善男子眼不念言我能生識因色思
惟終不念言我生眼識善男子如是等法因
緣和合是我法輪善男子天尊上人亦復如
是因於六情觀了諸法復因咽喉舌齒脣口
言語音聲說大法輪以是義故終不念言我
轉法輪善男子譬如木火因手因鑽而得生
火木火之生終不念言是手鑽生火亦不言
我能自生善男子天尊上人常轉法輪亦不
生念言我法輪善男子若不生念是則名爲

轉正法輪是轉法輪即名一乘海空寶藏復
次善男子吾昔於彼騫木樹下初說法輪九
萬天人俱來觀聽皆發信心樂於法所不起
于座

爾時天人即得无上微妙正果吾今於此七

寶城內初演一乘海空寶藏復有八百四萬
天人住於座所信心不退爾時天人即得四
天清淨道果

復次善男子一切天尊凡有說法皆悉名為
轉法輪也何以故譬如聖王所有奇珍是名

輪寶是輪寶者能令衆生得安穩城上下迴
轉无有怨賊善男子是法如是能運衆生到
安樂處无有煩惱善男子汝等於今應當讚
言一乘海空智惠寶藏是正法輪功德微妙
難可思議

月六

十四

爾時海空白天尊言天尊上人演於此法是
大法輪非為不知所以問者為欲利益諸衆
生故廣了一乘海空智藏祕密法輪非是凡
夫下仙學士之所能知爾時

天尊答海空言善哉海空善男子汝等已於

住大乘地所行正行所問正問善男子往昔
過去我於爾時作衆生身脩行一乘海空法
輪悉能通達一切外魔降伏其心不令毀壞
悉能受持一乘海空智惠法輪而作念言祕
密寶藏一乘法輪微妙功德不可思議我等
衆生應當捨其臭形之尸除諸外魔穢氣之
身
爾時座中諸天魔王聞是語已即設大齋捨
施財寶所愛妻子及居舍宅象馬車乘奴婢
僮僕悉皆施散設淨香花種種莊嚴來詣法

所懺悔往咎爾時

天尊聞是語已舉手撫几而答魔言善男子
一切凡夫不能善攝六根造惡則有煩惱為
惡所牽至不善處善男子譬如惡馬其性剛
戾能令乘者至嶮惡處不能善攝六根造惡

月六

十五

亦復如是令人遠離海空善道至諸惡處譬
如惡象心未調順有人乘之不隨意去遠離
城邑至於林野不能善攝六根造惡亦復如
是將人遠離海空寶城至於生死林野之處
善男子譬如佞臣教王作惡六根佞臣亦復

如是常教衆生造无量惡善男子譬如惡子
不受師長父母教誨无惡不造不調六根亦
復如是不順師長善言教勅无惡不造善男
子凡夫之人不攝六根常爲地獄畜生餓鬼
之所賊害亦如惡盜害及善人善男子凡夫
衆生不攝三毒馳騁五塵譬如牧牛不善守
護犯人苗稼凡夫之人不攝三毒常在諸有
多受苦惱善男子真人童子修大乘經行大
聖道常能善調守制三毒怖畏貪欲瞋恚愚
癡憍慢嫉妬爲得一切諸善法故善男子若

人善守此三毒根則能攝心若能攝心則攝
三毒善男子譬如有人擁護於身則護國土
護國土者則護於身真人童子亦復如是若
得聞見一乘海空微妙經典則得智慧得智
慧故則得專念六根若散念則能止何以故
是念惠故善男子如善牧牛設牛東西噉他
苗稼則便遮止不令食苗真人童子亦復如
是念惠因緣守攝六情不令馳散真人童子
有念惠心不見我相不見所相不見衆生及
所受用見一切法同法性相生於土石瓦礫

之相譬如屋舍從衆緣生无有定性見諸衆
生四大五陰之所成立推无定性无定性故
輪轉生死真人童子於生死中不生貪著見
諸衆生於煩惱中生煩惱想是故啓請一乘
海空祕密寶藏欲令衆生作種種法作種種

月六

十六

因作大船舫作大法橋善男子譬如畫師以
衆雜彩畫作衆像若男若女若牛若馬凡夫
无知見之則生男女等相畫師了知无有男
女真人童子亦復如是於法異相觀於一相
終不生衆生之相何以故有念惠故真人童

子脩行大乘海空寶經於時觀見端正女人
終不生於貪著之心何以故若觀相故善男
子真人童子知於欲想无有歡樂不得暫停
如犬啣骨如人逢火逆風而行如炭毒池夢
中所得別邊藥樹多人所擲亦如段肉衆鳥
競逐如水上泡畫水之跡如織經盡如囚羸
市猶如假借勢不得久觀欲如是多諸過惡
善男子真人童子見諸衆生貪著香味音聲
之觸從昔久遠无數劫來常受苦惱一一衆
生一劫之中所積身骨如玉京山所飲乳汁

如四海水父母兄弟妻子眷屬命終哭泣所
出目淚多四大海虛空星宿以為等數父母
兄弟亦不能盡无量劫來或在地獄畜生餓
鬼所受苦惱生死无量不可稱計善男子真
人童子深觀如是一切衆生受諸苦惱是故

月六

十七

慈念行生死苦不生爾時善男子譬如世間
有大衆藁方圓三千里爾時大王勅一賢臣
持一蜜瓶經由中過莫令傾覆若失一滴當
斷汝命復遣少剛拔刀在後隨而怖之臣受
王教盡心堅持往經爾所於大衆中雖見大

衆五情欲等心常念言我若施情著彼衆欲
當失所持大王蜜瓶若失王瓶命豈全濟以
是因緣堅固齋持不失一滴善男子真人童
子亦復如是往於煩惱生死之中不失智慧
以不失故雖見五欲心不貪著若見淨色不
生色想唯觀苦相乃至識想亦復如是不作
生相不作滅相不作因相生和合相生智慧
相真人童子住於爾所五根清淨故護持禁
戒一切凡夫五根不淨以不淨故不能護持
具足之戒不能善持真性功德是故真仙童

子常斷是故得无爲果常樂自在拔出有爲
永斷煩惱具足功德善男子復有離欲童子
常行无上甘露法藏故離於惡煩惱之業云
何爲離善男子若有衆生善能脩行一乘海
空微密寶藏書寫受持讀誦講說思惟義味
深越世間生死煩惱以是之故是名離惡何
以故此經能辯三洞七部道化符圖太平等
經善男子譬如明師導諸衆生於衆生中忽
有一人善能思惟信受教勅心不造惡口不
妄言離於家愛捨煩惱身善男子真人童子

亦復如是善能思惟明師教勅一乘海空微
密寶藏亦復如是心不造惡口不妄言善男
子譬如世間有善良藥若有衆生信心服之
盡其年命不爲一切惡毒傷惱復有一人唱
說良藥乃至盡命无有衆惡善男子一乘海

月六

十八

空亦復如是是世良藥若有一人善能受持
讀誦講說思惟義味盡其年壽不墮惡道復
有一人唱說一乘海空智藏即得人天形相
殊特善男子若有衆生善能書寫身手清淨
文字行次如玉清簡必得人天智慧童子立

侍天尊如彼明王形相端嚴善男子一乘海
空祕密寶藏有如是等无量功德難可思議
若有衆生爲他敷演思惟義味當知是人真
我弟子善能受持是我教旨是我之所護念
如是人者能了我相我隨其所住之處若
在山林曠野深遠房舍田宅樓閣宮殿我亦
在中常住不動我於是所常作受施或作道
士靜念思惟或作賢人善能講說一乘海空
真道之藏或作貧士詣門乞食云何當令是
人得知我於是所受人觀施常作變身隨方

顯現善男子如是人者居在其中夜中得夢
見諸神尊寶臺說法仙童玉女侍立邊傍或
見天人道士真像國王聖主太子王像復見
大山小山復見江河或見日月或見牛羊象
馬車乘或見見父母兄弟伯叔齋持七寶金銀

月六

十九

瑠璃真珠等寶詣於法所信心布施爾時當
知即是天尊受其所施如是之寤已歡喜故
尋得種種微妙之物於是思惟心不念惡普
行慈愛樂脩善法善男子一乘海空亦復如
是悉能成就如是无量諸天仙人受其功德

不可思議善男子汝今應當信受我語若有
衆生善男善女欲得海空欲見實相欲得脩
習祕密之藏常樂道場除於四魔離煩惱城
中得人天樂脩持一乘海空寶藏微妙經典
書寫讀誦爲他演說思惟義味汝當親近依
附諮受供養恭敬尊重讚歎洗其手足布置
床席諸事供給令无所乏若從遠來汝等應
當路次奉迎爲是經故所重之物應以奉獻
何以故如是經典難見難聞汝當一心諦聽
受持善男子我念過去未來見在无量无邊

諸天尊等各共集會
爾時衆中有一天尊名曰无形為諸大衆宣
說如是一乘海空秘密寶藏我於爾時從善
友聞了其義味我當為衆說一乘經海空寶
藏

爾時大衆得聞是經心大歡喜設大齋會我
於衆中化作貧士周行賣身无緣得售即欲
還家路逢一人我復語言吾欲賣身君能買
不其人答言我正須買恐君不從吾復語言
君何所使疑我情耶其人答言我家惡病大

醫處藥應服人眼卿若與之日給其服便當
與卿金錢七枚我時聞已心大踴躍歡喜无
量即於是時以雙慧眼明月瞳珠珠現於輪
我復語言汝與我錢今以雙眼隨汝所服於
是其人即與金錢我當得之便還本座建大

八六

二十

齋會供養尊奉然後誠心聽受是經我時聞
鈍雖得聞經唯能受持一句一字一乘寶藏
受持竟已即便迴還至於病家雖復日日與
其惠明常念一乘海空寶藏我身不痛日日
不廢足滿月旬以是因緣其病得差我身平

復无有瘡痍我於是時即見我身具足端正
微妙之相我當思念一乘海空祕密寶藏一
句之力尚能如是何況具足受持講說讀誦
思惟一乘義味我見此經有如是力如發善
心願於當來一切衆生得成仙道學一乘藏
微妙經典具足之相善男子以是一句因緣
力故令我今日於大衆中爲諸天人說一乘
藏善男子海空智藏不可思議利益一切无
量无边功德之相如是甚深祕密之義善男
子若有衆生善能受持斷離惡根云何爲惡

惡心惡意惡病惡念如是等惡悉能遠離即
得增長住於善根善根善思智慧方便以是
因緣是名遠離善男子真人童子住煩惱城
自觀其身如病如瘡如惡毒箭入其身體如
是身體是大苦聚善惡根本以是因緣瞻視

月六

二十一

於身非為貪身若將養身是餓鬼身是地獄
身是生死身善男子譬如猛火燒焚枯木亦
如芭蕉逢於霜雹如電石光如炎如化善男
子真人童子住煩惱城觀身具相亦復如是
若能遠離生死之身住於海空一乘寶藏即

得具足七十二相八十一好微妙之身成就
功德為法輪王常當護身何以故若不護身
命則不全命若不全則不能得書寫是經受
持讀誦廣說義味是故應當護持身命以是
義故真人童子遠離諸惡護持身命善男子

譬如衆生欲度海水善護船舫得到彼岸真
人童子亦復如是爾時海空與諸天人天仙
童子聞是語已心大踴躍受持諦聽得其義
味俱起作禮各還本國奉辭而退

太上一乘海空智藏經卷之六

